

Mart. Luther.

Wittenb. 1529.

J cl
6868



00
Rom

Sapientia [deutsch].



Die weis
heit Salomo
nis / An die Tyran
nen / Verdendscht
durch M. Luth.

Wittenberg.

1. 5. 2. 9.





L 2,3724.

Vorrede Mart. Luth.



Weil der itzige Reichstag zu Speyr/vns zu trennet hat/
das wir/so die Propheten fur vns
genommen haben/ vollend zu ver-
deutschen/nicht alle beyeinander
haben sein mügen/ Vnd ich auch
zufelliger schwachheit/verhindert/
das ich zu solchen vnd andern geschess-
ten vngeschickt gewest/ Vnd doch nicht gar müßig sitzen
wolt/hab ich die weil dis höltzlin genommen/vnd
dran geschnitzt/nemlich das buch von der Weis-
heit/mit hülff meiner gutē freunde verdeuscht/
vnd so viel vns Got verlihen/aus dem finstern la-
tinschen vnd Griechischen/ynn das deutsche
licht gebracht/ Vnd obs wol von andern zuuor
verdeuscht ist/ Aicht ich doch/ ihener deutsch
solt vnser deutsch/wol neben sich leiden/odder
auch wol schier bedürffen.

Es ist aber dis buch lange ym zang gestan-
den/obs vnter die bücher der heiligen schrift des
alten testaments zu rechnen sein solt/odder nicht/
Sonderlich weil der tichter sich hören lesst ym
neunden Capitel/ als redet ym diesem gantzen
buch der könig Salomon/welcher auch von der
weisheit ym buch der künige hoch gerhümet
wird. Aber die alten veter habens stracks aus der
zal der heiligen schrift gesondert/vnd gehalten/
Es sey vnter der person des küniges Salomon
gemacht/auff das es vmb solches hochberümb
A ten

ten Königes namen vnd person willen/deste mehr
geacht/vnd grösser ansehen hette/bey den gewal
tigen auff erden / An welche es furnemlich ge
schrieben ist / Vnd villeicht lengest vntergangen
were/wo es der meister/so er geringes ansehen ge
west/vnter seinen namen hette lassen ausgehen.

Sie halten aber / Es solle Philo dieses buchs
meister sein/welcher on zweifel der aller geleertes
ten vnd weisesten Juden einer gewesen ist/so das
Jüdisch volck nach den Propheten gehabt hat/
wie er das mit andern büchern vnd thaten bewei
set hat / Denn zur zeit des keisers Caligula/da die
Juden/durch etliche Griechen/als Appion von
Alexandria vnd andern mehr/auffs aller schend
lichst wurden mit lasterschriffen vnd schmach
reden geschendet/vnd darnach fur dem keiser
auffs aller giftigest angegeben vnd verklagt/
ward genanter Philo vom Jüdischen volck zum
keiser geschickt/die Juden zu verantworten vnd
zu entschuldigen/Als aber der keiser so gar erbit
tert war auff die Juden/das er sie von sich wei
set vnd nicht hören wolt/dalies sich Philo/als
ein man vol muts vnd trostes hören/vnd sprach
zu seinen Juden/Wolan lieben brüder/erschreckt
des nicht vnd seid getrost/ Weil menschen hülffe
vns absagt/so wird gewislich Gottes hülffe bey
vns sein.

Aus solchem grund vnd ursache/dunckt mich/
sey dis buch geflossen/das Philo/die weil seine
vnd der Juden sache vnd recht nicht hat mügen
stat finden fur dem keiser/wendet er sich zu Gott/
vnd dreyet den gewaltigen vnd bösen meulern/
mit

mit Gottes gericht/ Drumb redet er auch so hefftig vnd scharff ym ersten vnd andern Capitel/ widder die gifftigen bösen zungen/ so den gerechten vnd vnschuldigen vmb der warheit willen verfolgen vnd vmbbringen/ Vnd darnach widder die gewaltigen einfuret die grossen exempel Göttlichs gericht/ so Gott vber den König Pharao vnd die Egypter geübt hat/ vmb der Kinder Israhel willen/ Vnd thuts mit so trefflichen hefftigen Worten/ als wolt er gerne/ beide den Keiser/ die Römer/ vnd die gifftigen zungen der Griechen/ so widder die Juden tobeten/ mit eym iglichen wort treffen/ vnd durch solche mechtige exempel abschrecken/ vnd die Juden trösten/ Endlich/ so man die zeit/ geschicht vnd schrift Philonis ansihet/ vnd dis buch dagegen helt/ so Judentzet es so starck/ vnd reimet sich so gar eben zusammen/ das die heiligen veter nicht on grosse vrsache den Philon dieses buchs meister halten.

Aber hernachmals ist dis buch von vielen für ein recht buch der heiligen schrift gehalten/ sonderlich aber yn der Römischē Kirchen/ also hoch vnd schon gehalten/ das freilich kaum aus einem buch ynn der schrift/ so viel gesanges gemacht ist/ als aus diesem/ villeicht aus der vrsache/ weil ynn diesem buch die tyrannen so hefftig mit Worten gestraffet vnd angegriffen/ widderumb die heiligen vnd meurerer so höchlich getröstet werden/ Vnd zu Rom die Christen mehr denn sonst ynn aller welt/ verfolget vnd gemartert wurden/ haben sie dis buch am meisten getrieben/ als das sich zur sachen so eben reimet/ mit dreyen widder

A in die

Die tyrannen/ vnd mit trösten für die heiligē/ Wie
wol sie viel stück darynn nicht verstanden/ vnd
gar oft bey den haren gezogen haben/ wie denn
auch sonst der gantzen heiligen schrift oft ge-
schehen ist vnd teglich geschicht.

Wie dem allen/ Es ist viel guts dinges drin-
nen/ vnd wol werd/ das mans lese/ Sonderlich
aber solten es die grossen hansen/ so widder yhre
vnterthanen toben vnd widder die vnschuldigen/
ymb Gottes wort willen/ wueten/ Denn die sel-
bigen spricht er an ym sechsten Capitel/ vnd be-
kennet/ das dis buch an sie sey geschrieben/ da er
spricht/ Euch Tyrannen gelten meine rede ꝛc.
Vnd seer fein zeuget er/ das die weltlichen ober-
herrn/ yhre gewalt von Gott haben/ vnd Gottes
amptleute seien/ Aber drowet yhn/ das sie tyran-
nisch solchs Göttlichen befolhen ampts brau-
chen/ Darumb kompt dis buch nicht vneben zu
vnsrer zeit/ an den tag/ die weil itzt auch die tyran-
nen getrost yhrer oberkeit missebrauchen/ widder
den/ von dem sie solche oberkeit haben/ Vnd le-
ben doch wol so schendlich ynn yhrer abgötterey
vnd vnchristlicher heiligkeit/ als hie Philo die
Römer vnd Weiden/ ynn yhrer abgötterey be-
schreibet/ das sichs allenthalben wol reimet auff
vnsrer itzige zeit.

Man nennet es aber/ Die Weisheit Salomo-
nis/ darumb/ das (wie gesagt ist) vnter Salo-
mons namen vnd personen getichtet ist/ vnd die
weisheit gar herrlich rhümet/ nemlich/ was sie
sey/ was sie vernag/ wo her sie come/ Vnd gefel-
let mir das aus der massen wol drinnen/ das er
das

das wort Gottes so hoch rhümet/ vnd alles dem
wort zuschreibet/ was Got yhe wonders gethan
hat/ beide an den feinden vnd an seinen heiligen/
Daraus man klerlich erkennen kan/ das er weis-
heit hie heisst/ nicht die kluge/ hohe gedancken
der heidnischē lerer vnd menschlicher vernunfft/
Sondern das heilige Göttliche wort/ Vnd was
du hierinn lobes vnd preises von der weisheit hö-
rest/ da wisse/ das es nicht anders/ denn von dem
wort Gottes gesagt ist/ Den er auch selbs ym. 16.
Capitel spricht/ Die Kinder Israel seyen nicht
durch das hymel brod erneeret/ noch durch die
eherne schlange gesund worden/ sondern durch
Gottes wort/ wie Christus Matth. 4. auch sagt.
Darumb leret er/ das die weisheit nirgent her ko-
me/ denn von Got/ vnd furet also aus der schrift
viel exempel drauff/ vnd gibts der weisheit/ das
die schrift dem wort Gottes gibt.

Solchs habe ich beste lieber geredt/ das man
gemeniglich das wort/ Weisheit/ anders ver-
nimpt/ denn es die schrift braucht/ Nemlich/
wenn mans höret/ so feret man mit fliegenden ge-
dancken dahin/ vnd meinet/ es sey nichts denn
gedancken/ so ym der weisen lente hertzen verbor-
gen ligen/ Vnd helt die weil das eusserliche wort
odder schrift nicht fur weisheit/ So doch aller
menschen gedancken/ on Gottes wort/ eitel lügen
vnd falsche trewme sind/ Darumb weil dieses
buchs name heisst/ Die Weisheit Salomonis/
ists gleich so viel gesagt/ als spreche ich/ Ein
Buch Salomonis vom Wort Gottes/ Vnd der
geist der Weisheit nicht anders/ denn der glaube
odder

odder verstand des selbigen worts / welchen doch
der heilige geist gibt / Solcher glaube odder geist
vermag alles vnd thut / wie dis buch rühmet yn
siebenden Capitel.

Zu letzt ist dis buch ein rechte anslegunge vnd
exempel des ersten gebots / Denn hie siehestu / das
er durch vnd durch leiet Gott furchten vnd traw
en / Schreckt die ihenigen mit exempeln Gött
lichs zorns / so sich nicht furchten vnd Gott vers
achten / Widderumb tröstet die ihenigen mit ex
empeln Göttlicher gnade / so yhm glauben vnd
trawen / Welchs nichts anders ist / denn der rech
te verstand des ersten gebots / Daraus man auch
mercken kan / das aus dem ersten gebot / als aus
dem heubtborn / alle weisheit quillet vnd fleus
set / Vnd freilich dasselbige gebot / die rechte son
ne ist / da alle weisen bey sehen / was sie sehen /
Denn wer Gott furcht vnd glaubet / der ist vol
ler weisheit / aller welt meister / aller wort vnd
werck mechtiger / aller lere vnd leben / so fur Gott
gilt vnd hilfft / richter / Widderumb / Wer das
erste gebot nicht hat / vnd Gott widder furcht
noch trawet / der ist voller torheit / kan nichts
vnd ist nichts / Vnd das ist die furne
mest ursach / warumb dis buch
wol zu lesen ist / das man Got
furchtē vnd trawen lerne /
da er vns zu helffe
mit gnaden /
Amen.

Ed 6868

ULB Halle


3

003 710 238



[Yb Bl. 208]





In 6 B^und von
des Waisens.

Wittenb. 1529.

1977

L

1025

00 / 100 ca 2

[Die Weisheit Salomonis / ... / Verdenrecht
durch M. Luth.]

Das Buch von der weisheit.

Das Erste Capitel.



Habt gerechtigkeit
lieb / die yhr land vnd leute rich-
tet. Verseheth euch alles guts zum
D E X X I / vnd sucht yhn mit
einfeltigem hertzen / Denn er lesst
sich finden von denen / so yhn ni-
cht versuchen / Vnd erscheinet de-
nen / die yhm nicht mistrawen / Aber falsche
dünnkel scheiden von Gott / Die aber ynn der
that bewerd sind / beweisen / das ihene vnuersten-
dig sind / Denn die weisheit kompt nicht ynn ei-
ne böshafftige seele / vnd wonet nicht ynn eym
leibe der sunden vnterworffen.

Denn der heilige geist / so züchtig macht / fleugt
die falschen / vnd weichet von den frechen ge-
dancken / welche gestrafft werden mit den sun-
den / die vber sie verhenget werden / Denn die
weisheit ist so frum / das sie den lesterer nicht vn-
schuldigelt / So ist Gott ein zeuge vber die nie-
ren / vnd / der das hertz sihet / ist warhafftig / vnd
höret alle zungen / Denn der welt kreis ist vol
geists des D E X X I / Vnd der die rede kennet /
ist allenthalben.

B Darumb

(Frechen)
Die mit dem kopff
hindurchwollen.



L. 2, 2063

(Euerigen)
Das ist Gottes ohr.

Darumb kan der nicht verborgen bleiben/
der das vnrecht redet/ Vnd das recht/ so yhn
straffen sol/wird sein nicht feylen/Denn der Got
losen anschlege wird man erkündigen/vnd von
seinen redē wird ein geschrey fur den **HEHRT**
komen / das seine vntugend gestrafft werde/
Denn des eyuerigen ohr höret alles/vnd das ge-
schweetz der mürmeler/wird nicht verborgen blei-
ben.

So hüetet euch nu fur dem vnnützen gemur-
mel/ vnd enthaltet die zungen fur dem affterres-
den / Denn das yhr heimlich miteinander ynn
die ohren redet/wird nicht so leer hin gehen/denn
der mund/ so da leuget/todtet die seele.

Strebt nicht so nach dem tod mit ewrem yrris-
gen leben/ Vnd ringet nicht so nach dem verder-
ben/durch ewr hende werck/Denn Gott hat den
tod nicht gemacht/vnd hat nicht lust am verder-
ben der lebendigen / Sondern er hat alles ge-
schaffen/ das es ym wesen sein solte / Vnd was
ynn der welt geschaffen wird / das ist Igut/ Vnd
ist nichts schedlichs drynnen/ dazu ist der hellen
reich nicht auff erden (Denn die gerechtigkeit ist
vnsterblich) Sondern die Gottlosen ringen dar-
nach/ beide mit Worten vnd mit wercken/ Denn
sie halten yhn fur freund/ vnd faren dahin/vnd
verbinden sich mit yhm / denn sie sind auch
werd/das sie seines teils sind.

Das Ander Capitel.

Denn

77L 1025

M
1916

Denn sie reden mit einander nicht recht
 von der sachen/ Es ist ein kurtz vnd mü-
 heselig ding vmb vnser leben / Vnd
 wenn ein mensch dahin ist / so ist's gar
 aus mit yhm / So weis man keinen nicht/ der
 aus der helle wider komē sey. Vn gefehr sind wir
 geboren/ vnd faren widder dahin/ als weren wir
 nie gewesen/ Denn das schnauben ynn vnser nasen
 ist ein rauch/ vnd vnser rede ist ein fūncklin/ das
 sich aus vnserm hertzen regt/ Wenn dasselbige
 verlosschen ist/ so ist der leib dahin/ wie ein lod-
 derassche/ vnd der geist zufladdert/ wie ein dünne
 lufft/ Vnd vnser namens wird mit der zeit ver-
 gessen/ das freilich niemand vnser thuns geden-
 cken wird / Vnser leben feret dahin / als we-
 re ein wolcken da gewesen/ vnd zergethet wie ein ne-
 bel / von der sonnen glantz zutrieben / vnd von
 yhrer hitze verzeret / Vnser zeit ist / wie eine
 schatte dahin feret/ Vnd wenn wir weg sind/ ist
 kein widderkeren/ Denn es ist fest versiegelt/ das
 niemand widderkompt.

(Dn gefehr)
 Das ist/ wir werden
 geboren on Gottes
 vorsehung odder rat.

Wolher nu/ vnd lasst vns wol leben/ weils
 da ist/ vnd vnser leibs brauchen / weil er iung
 ist / Wir wollen vns mit dem besten wein vnd
 salben fullen. Lasst vns die meyen blumen ni-
 cht verseumen/ lasst vns krentze tragen von iun-
 gen rosen/ ehe sie welck werden/ Vnser keiner las
 yhm feylen mit brangen/ das man allenthalben
 spüren müge/ wo wir frölich gewesen sind/ Wir
 haben doch nicht mehr dauon/ denn das.

(Meyen blumen)
 Das ist/ vnser scho-
 nen frischen iugent/
 ehe wir alt vnd vns
 tüchtig werden.
 Nendum est etate
 etc.

(Orangen)
 Vn fausse leben.

Lasst vns den armen gerechten vberweldigen/
 B ij vnd

vnd keiner widwen noch alten mans schonen/
last vns der alten grysen straff nicht achten/ Ge-
walt sey das Recht bey vns/ Denn wer nicht ge-
walt vben kan/der ist veracht/ So lasst vns auff
den gerechten lauren/denn er tang fur vns nicht/
vnd setzet sich widder vnser thun/vnd schilt vns/
das wir widder das gesetzte sundigen / vnd ruffet
aus vnser wesen fur sünde / Er gibt fur/ das er
Got kenne/vnd rühmet sich Gottes kind/strafft/
was wir ym hertzen haben/ Er ist vns nicht leid-
lich/auch anzusehen. Denn sein leben reimet sich
nichts mit den andern / vnd sein wesen ist gar ein
anders / Er helt vns fur vntuchtig/ vnd meydet
vnser thun/als einen vnflat/Vnd gibt fur/wie es
die gerechten zu letzt gut haben werden/ vnd rüh-
met/das Gott sein vater sey.

So lasst doch sehen/ob sein wort war sey/
vnd versuchen / wie es mit yhm ausgehen wil/
Ist der gerecht/Gottes son/so wird er yhm helf-
fen / vnd erretten von der hand der widderfas-
cher / Mit schmach vnd qual wollen wir yhn
stöcken / das wir seine gelindigkeit erfahren /
vnd seine gedult erkennen / Wir wollen yhn zum
schendlichen tod verdamnen/ da wird man yhn
kennen an seine worten.

Solches schlagen sie an / vnd feylen /
Yhr bösheit hat sie verblindet / das sie Gottes
geheimnis nicht erkennen / Denn sie haben
der hoffnung nicht/das ein heilig leben belohnet
werde / Vnd achten der ehren nichts/so vnstreff-
liche seelen haben werden/ Denn Gott hat den
menschen

menschen 'geschaffen / zum ewigen leben / Vnd
hat yhn gemacht zum bilde / das er gleich
sein sol / wie er ist / Aber durchs teuffels neyd ist
der tod ynn die welt komen / Vnd die seins teils
sind / helffen auch dazu.

Das dritte Capitel.

Aber der gerechten seelen sind ynn Got-
tes hand / vnd kein qual rüret sie an / Fur
den vnuerstendigen werden sie angese-
hen / als stürben sie / Vnd yhr abschied
wird fur ein pein gerechnet / vnd yhr hinfart fur
ein verderben / Aber sie sind ym friede / ob sie wol
fur den menschen viel leidens haben / so sind sie
doch gewisser hoffnung / das sie nymmermehr ster-
ben / Sie werden ein wenig gesteuert / Aber
viel guts wird yhn widderfaren / Denn Gott ver-
sucht sie / vnd findet sie / das sie sein werd sind.

Er prüfet sie / wie gold ym ofen / vnd nympt
sie an / wie ein volliges opffer / Vnd zur zeit / wenn
Gott drein sehen wird / werden sie helle scheinen /
Vnd daher faren / wie funcken durch die stop-
peln / Sie werden die Heiden richten / vnd hir-
schen vber völder / vnd der Herr wird ewiglich
vber sie hirschen / Denn die yhm trawen / die ver-
nemen die warheit / vnd die trew sind ynn der lie-
be / bleiben bey yhm / Denn seine heiligen sind
ynn gnaden vnd barmhertzigkeit / Vnd er hat ein
auff sehen auff seine aufferweleten

(Stoppeln)
Sind die Heiden
vnd Gottlosen.

Aber die Gottlosen werden gestrafft werden /
B ij gleich

gleich wie sie furchten / Denn sie achten des gerechten nicht / vnd weichen vom **WORT**. Denn wer die weisheit vnd die rute veracht / der ist vnseelig / Vnd yhr hoffnung ist nichts / vnd yhr arbeit ist vmb sonst / vnd yhr thun ist kein nütze / Yhre weiber sind nerryn / vnd yhr kinder böshafftig / Verflucht ist / was von yhn geboren ist.

Denn selig ist die vnfruchtbare die vnbesleckt ist / die da vnschuldig ist des sundlichen bettes / Die selbige wirds geniessen zur zeit / wenn man die seelen richten wird.

Desselbigen gleichen ein vnfruchtbarer / der nichts vnrechts mit seiner hand thut / noch arges widder den **WORT** denckt / dem wird gegeben / so er des glaubens ist / ein sonderliche gabe / vnd ein besser teil ym tempel des **HERRN** / Denn gute erbeit / gibt herlichen lohn / Vnd die würtzel des verstands verfaulet nicht.

Aber mit den kindern der ehebrecher hats keinen bestand / Vnd der same aus vnrechtem bette / wird vertilget werden / Vnd ob sie gleich lange leben / so helt man doch nichts von yhn / vnd yhr alter zu letzt wird doch on ehre sein / Sterben sie aber balde / so haben sie doch nichts zu hoffen / noch trost zur zeit / wenn mans vnterscheiden wird / Denn die vngerechten nemen ein böse ende.

Das Vierte Capitel.

Besser

Besser ist's mensch leben / so man frum
ist / Denn dasselbige bringt ewiges
lob / Denn es wird beide bey Gott
vnd den menschen gerühmet / Wo
es ist / da nympt man es zum exempel an / Wers
aber nicht hat / der wündschet es doch / Vnd pran
get ym ewigem Krantz / vnd behelt den sieg des
menschlichen Kampffs.

Aber die fruchtbar menge der Gottlosen sind
kein nutze / Vnd was aus der hurerey gepflantz
wird / das wird nicht tieff wortzeln / noch gewiss
sen grund setzen / Vnd ob sie eine zeitlang an den
zweigen grünen / weil sie gar lose stehen / werden
sie vom winde bewegt / vnd vom starcken winde
ausgerott / vnd die vnzeitigen este werden zu bro
chen / vnd yhr frucht ist kein nutze / vnreiff zu es
sen vnd zu nichts tugend / Denn die kinder / so aus
vnehlichem beyschlaff geboren werden / müssen
zeugen von der bosheit / widder die eltern / wenn
man sie fragt.

Aber der gerechte / ob er gleich zu zeitlich stir
bet / ist er doch ym der ruge (Denn das alter ist
ehrlich / nicht das lange lebet / odder viel iar hat /
Klugheit vnter den menschen ist das rechte gra
we har / vnd ein vnbesleckt leben ist das rechte
alter) Denn er gefelt Gott wol vnd ist yhm lieb /
vnd wird weg genomen aus dem leben vnter den
sundern / vnd wird hingeruckt / das die bos
heit seinen verstand nicht umbwende / noch fals
sheit seine seele betriege / Denn die bösen exempel
verfurē vnd vertunckeln eym das gut / vnd die rei
tzende



tzende lust verkeret vnschuldige hertzen / Er ist
bald volkomen worden / vnd hat viel iar erfullet /
Denn seine seele gefellt Gott / darumb eilet er mit
yhm aus dem bösen leben.

Aber die leute / so es sehen / achtens nis
cht / vnd nemens nicht zu hertzen / nemlich / das
die heiligen Gottes ynn gnade vnd barmhertzig
keit sind / vnd das er ein auff sehen auff seine auß
serweleten hat / Denn es verdampt der verstorben
gerechte die lebendigen Gottlosen / vnd ein iun
ger / der bald volkomen wird / das lange leben
des vngerechten / Sie sehen wol des weisen ende /
Aber sie mercken nicht / was der Herr vber yhm
bedenckt / vnd warumb er yhn bewaret / Sie
sehens wol / vnd achtens nichts / Denn der Herr
verlachtet sie / vnd werden darnach schendlich fal
len / vnd eine schmach sein vnter den todten ewig
lich / Vnd er wird sie vnuersehens hernidder stor
tzen / Vnd wird sie aus dem grund werffen / das
sie endlich zu boden ligen / Vnd sie werden yn eng
sten sein / Vnd yhr gedechnis wird verloren sein /
Sie werden aber komē verzagt mit dem gewissen
yhrer sunden / Vnd yhre sünde werden sie vnter
augen schelten.

Das Funffte Capitel.

Als denn wird der gerechte stehen mit
grosser freidigkeit / widder die / so yhn
geengstet haben / vnd so seine arbeit ver
worffen haben / Wenn die selbigen
denn

(Arbeit)
Seine lere vnd
sein thum.

denn solchs sehen/ werden sie grausam erschre-
cken/ fur solcher seligkeit/ der sie sich nicht verses-
hen hetten/ Vnd werden vnternander reden mit
rewe/ vnd fur angst des geists seufftzen/ Das ist
der/ welchen wir etwa fur ein spott hatten/ vnd
fur ein hönisch beyspiel/ Wir narren/ hielten
sein leben fur vnynnig/ vñ sein ende fur ein schan-
de/ wie ist er nu gezelet vnter die kinder Gottes/
vnd sein erbe ist vnter den heiligen? Darumb so
haben wir des rechten weges gefeylet/ vnd das
liecht der gerechtigkeit hat vns nicht geschienen/
vnd die Sonne ist vns nicht auffgangen/ Wir
haben eitel vnrechte vnd schedliche wege gegan-
gen/ vnd haben gewandelt wuste vnwege/ Aber
des **W E R T** weg haben wir nicht gewust/
Was hilfft vns nu der pracht? Was bringt vns
nu der reichthum sampt dem hohmut? Es ist al-
les dahin gefaren / wie eine schatte/ vnd wie ein
geschrey das fur vber feret / wie ein schiff auff
den wasser wogen dahin leufft/ welchs man/ so
es fur vber ist/ keine spur finden kan/ noch dessel-
bigen ban ynn der flut/ Doder wie ein vogel der
durch die lufft fleuget/ da man seines weges keine
spure finden kan/ Denn er regt vnd schlegt ynn
die leichte lufft/ treibt vnd zuteylet sie mit seinen
schwebenden flügeln/ vnd darnach findet man
kein zeichen solchs fluges darynnen/ Doder als
wenn ein pfeil abgeschossen wird zum ziel/ die
zuteilete lufft bald widder zusammen felt/ das man
seinen flug dadurch nicht spüren kan.

Also auch wir/ nach dem wir geboren sind
gewesen/ haben wir ein ende genomen/ Vnd
C haben

Haben kein zeichen der tugend beweiset / Aber vnn
vnser bosheit sind wir verzeret / Denn des Gotts
losen hoffnung / ist wie ein staub vom winde ver-
strewet / vnd wie ein dünner reiffe von eym sturm
vertrieben / vnd wie ein rauch vom winde ver-
wehd / vnd wie man eines vergisset / der nur einen
tag gast gewesen ist.

Aber die gerechten werden ewiglich leben /
vnd der D E X X ist yhr lohn / vnd der Döhest
sorget für sie / Darumb werden sie empfahen ein
herrlichs Reich / vnd eine schöne Krone von der
hand des D E X X I / Denn er wird sie mit seiner
rechten beschirmen / vnd mit seinem arm vertheydi-
gen / Er wird seinen eyer nemen zum harnisch /
vnd wird die creatur rüsten zur rach vber die feind-
de / Er wird gerechtigkeit anziehen zum krebs /
vnd wird das ernste gerichte auffsetzē zum helm /
Er wird herrligkeit nemen zum vnverwindli-
chem schilde / Er wird den strengen zorn wetzen
zum schwerd / Vnd die welt wird mit yhm zum
streit ausziehen widder die vnweisen / Die ge-
schos der blitzen / werden gleich zu treffen / vnd
werden aus den wolcken / als von einem hartge-
spannen bogen faren / zum ziel / vnd wird dicker
hagel fallen / aus dem zorn der donner schlege /
So wird auch des meeres wasser widder sie wü-
ten / vnd die strome werden sich miteinander heff-
tig ergiessen / Vnd wird auch ein starcker wind
sich widder sie legen / vnd wird sie wie wirbel zu-
strewen.

Das Sechste Capitel.

Vnge

Nirgerechtigkeit verwüſtet alle land / vñ
böſe leben ſtortzt die ſtuele der gewaltigen.
So höret nu yhr Könige vnd merck
et / Lernet yhr richter auff erden / Nemet
zu ohren / die yhr vber viele hirſſchet / die yhr
euch erhebt vber den völcern / Denn Euch iſt die
öberkeit gegeben vom **DEUS** / Vnd die gewalt
vom Höchſten / welcher wird fragen / wie
yhr handelt / vnd forſſchen / was yhr ordenet.

Denn yhr ſeid ſeines reichs amptleute / aber
yhr furet ewer ampt nicht fein / vnd haltet kein
recht / vnd thut nicht nach dem / das der **DEUS**
geordnet hat / Er wird gar greulich vnd kurtz
vber euch komen / Vnd es wird gar ein ſcharff
gericht gehen vber die oberherrn / Denn den ge
ringen widderferet gnade / Aber die gewaltigen
werden gewaltiglich geſtrafft werden / Denn
der / ſo aller herr iſt / wird keines person fürchten /
noch die macht ſchewen / Er hat beide die kleinē
vnd groſſen gemacht / Vnd ſorget für alle gleich.
Ober die mechtigen aber wird ein ſtarck gericht
gehalten werden.

Mit euch Tyrannen rede ich / auff das yhr
weisheit lernet / vnd das euch nicht feyle / Denn
wer heilige lere heiliglich behelt / der wird heilig
gehalten / Vnd wer die ſelbige wol lernet / der
wird wol beſtehen / So laſt euch nu meine rede
gefallen / Begerd ſie / vnd laſt euch leren /
Denn die weisheit iſt ſchone vnd vnmüergenglich
/ vnd leſt ſich gern ſehen von denen / die
ſie lieb haben / vnd leſt ſich finden von denen /
die ſie ſuchen / Ja ſie kompt zuvor denen / die
C ij ſie

sie gerne haben / das sie erkand werde / Wer sie
gern bald hette / darff nicht viel mühe / Er findet
sie fur seiner thür auff yhn warten / Denn sie bege
ren / ist grosse klugheit / Vnd wer wacker ist nach
yhr / darff nicht lange sorgen / Denn sie gehet
vmbher / vnd sucht wer yhr werd sey / vnd erschei
net yhm williglich vnter wegen / vnd hat acht
auff yhn / das sie yhm begegene / Denn wer sich
gerne lesst weisen / da ist gewislich der weisheit
anfang / Wer sie aber achtet / der lesst sich gerne
weisen / Wer sich gerne weisen lesst / der helt yhre
gebot / Wo man aber die gebot helt / da ist ein hei
lig leben gewis / Wer aber ein heilig leben furet /
der ist Gott nahe. Wer nu lust hat zur weisheit /
den macht sie zum herrn / Wolt yhr nu / yhr Ty
rannen ym volck / gerne könige vnd fursten sein /
so haltet die weisheit ynn ehren / auff das yhr
ewiglich hirschet.

Was aber weisheit ist / vnd wo sie herkome /
wil ich euch verkündigen / vnd wil euch die ge
heimnis nicht verbergen / Sondern forschen von
anfang der Creaturen / Vnd wil sie offentlich zur
kennen dargeben / vnd wil der warheit nicht spa
ren / Denn ich wil mit dem giftigen neyd nicht zu
thun haben / Denn der selbige hat nichts an der
weisheit / Wenn aber der weisen viel ist / das ist
der welt heil / Vnd ein kluger könig ist des volcks
gluck / Darumb lasst euch weisen durch meine
wort / das wird euch frumen.

Das Siebende Capitel.

Ich bin

Ich bin auch ein sterblicher mensch/
gleich wie die andern/ geboren vom ge-
schlechte des ersten geschaffenen mens-
chen/ vnd bin ein fleisch gebildet / zehē
mondlang ym blut verhertet/ aus mans samen
durch lust/ so ym beyschlaffen geschicht. Vnd ha-
be auch/ da ich geboren war/ odem geholet aus
der gemeinen lufft/ vnd bin auch gefallen auff's
erdreich/ das vns alle gleich tregt/ vnd ist auch
gleich wie der andern/ weinen/ mein erste stym ge-
west/ vnd bin yn den windeln erneret mit sorgen/
(Denn es hat kein kōnig einen andern anfang sei-
ner geburt) Sondern sie haben alle einerley ein-
gang ynn das leben/ vnd gleichen ausgang.

Darumb so bat ich/ vnd ward mir klugheit
gegeben / Ich rieß / vnd mir kam der geist der
weisheit/ Vnd ich hielt sie thewrer denn kōnig-
reich vnd furstenthūm/ vnd reichthum hielt ich für
nichts gegen sie / Ich gleichet yhr keinen edel-
stein/ Denn alles gold ist gegen sie/ wie geringer
sand/ Vnd sylber ist wie kot gegen sie zu rechnen/
Ich hatte sie lieber/ denn gesunden vnd schonen
leib/ Vnd erwelete sie mir zum liecht/ Denn der
glantz/ so von yhr gehet/ verlesschet nicht/ Es
kam mir aber alles gutes mit yhr/ vnd vnzelich
reichthum ynn yhrer hand/ Ich war ynn allen
dingen frōlich / das macht/ die weisheit gieng
mir ynn den selbigen für/ Ich wusts aber nicht/
das solchs von yhr keme/ Einfeltiglich hab ichs
gelernt/ Mildiglich teyl ichs mit/ Ich wil yhren
reichthum nicht verbergen/ denn sie ist den men-
schen ein vnendlicher schatz / Welchs so da ge-
C iij brauchen/

brauchen/werden Gottes freunde/Vnd sind an-
geneme/darumb das yhn gegeben ist/sich lassen
zu weisen.

Alle welt kennet diese
ding das mehrer teil/
Über allem die gley-
bigen wissen/das sie
Gottes creatur/ vnd
durchs wort vñ Got-
tes weisheit/geschaf-
fen sind.

Gott hatt mir gegeben weislich zu reden/
vnd nach solcher gabe der weisheit/recht geden-
cken/Denn er ist/der auff dem wege der weis-
heit furet/vnd die weisen regiert/Denn ynn sei-
ner hand sind beyde wir selbs vnd vnser rede/da-
zu alle klugheit/vnd kunst ynn allerley geschaff-
te/Denn er hat mir gegeben gewisse erkentnis al-
les dinges/das ich weis/wie die welt gemacht
ist/vnd die krafft der Element/Wie die zeit anfe-
het/wie sie am ende vnd ym mittel ist/Wie man-
cherley sich die creatur des iars erzeigt/Wie man-
cherley zeit man des iars hat/vnd wie das iar
herumb laufft/Wie die stern stehen/Was die
thier fur art haben/vnd wie vngezeme die wilden
thier sind/Wie der wind so gewaltig ist/vñ was
die leute ym synn habē/Mancherley art der pflan-
zen/vnd krafft der würtzeln/Ich weis alles
was heimlich vnd verborgen ist/Denn die weis-
heit/so aller kunst meister ist/leret michs/Denn
es ist ynn yhr der geist/der verstendig ist/heilig/
einig/manchfeltig/scharff/behend/bered/rein/
klar/sanfft/freundlich/ernst/on schew/wolthe-
tig/leutselig/fest/gewis/sicher/vermag alles/
sihet alles/vnd gehet durch alle geister/wie ver-
stendig/lauter/scharff sie sind/Denn die weis-
heit ist das aller behendest/Denn sie feret vnd ge-
het durch alles/so gar lauter ist sie/Denn sie ist
ein heller glantz der Göttlichen krafft/vnd ein
stral der herrligkeit des almechtigen.

Darumb

Darumb kan nichts vnreines zu yhr Kommen/
Denn sie ist ein glantz des ewigen liechts/ vnd ein
vnbesleckter spiegel der Göttlichen krafft/ vnd ein
bilde seiner gütigkeit/ Sie ist einig/ vnd thut doch
alles/ sie bleibt bey sich selbs/ vnd vernemet doch
alles/ Vnd fur vnd fur gibt sie sich ynn die heili-
gen seelen/ vnd macht Gottes freunde vnd Pro-
pheten/ Denn Got liebet niemand/ er bleibe denn
bey der weisheit/ Sie gehet einher herlicher denn
die sonn vnd alle sterne/ vñ gegē das liecht gerech-
net/ gehet sie weit vor/ Denn das liecht mus der
macht weichen/ Aber die bosheit vberweldiget
die weisheit nymermehr/ Sie reicht von eym en-
de zum andern gewaltiglich / vnd regiert alles
wol.

Das Achte Capitel.

Die selbige hab ich geliebt vnd gesucht
von meiner iugent auff/ vnd gedacht
mir sie zur braut nemen/ Denn ich hab
yhre schone lieb gewonnen/ Sie ist her-
lichs adels/ denn yhr wesen ist bey Gott/ Vnd
der herr aller ding hat sie lieb/ Sie ist der heimli-
cher rat ym erkentnis Gottes/ vnd ein angeber
seiner werck/ Ist reichthum ein köstlich ding ym
leben? was ist reicher/ denn die weisheit/ die al-
les schafft? Thuts aber klugheit? wer ist vnter
allen ein kunstlicher meister denn sie? Hat aber
yemand gerechtigkeit lieb? yhr erbeit ist eitel tu-
gend/ Denn sie leret zucht/ klugheit/ gerechtigkeit
vnd stercke/ welche das aller nützeft sind ym men-

(Stercke)
Das ist/ man-
lich/ mütig/ ge-
trost vnd frey-
dig sein.

146
schen leben/ Begerd einer viel dings zu wissen/ so
kan sie erraten / beyde/ was vergangen vnd zu/
künfftig ist/ Sie verstehet sich auff verdeckte
wort/ vnd weis die retzel auff zulosen. Zeichen
vnd wunder weis sie zumor/ vnd wie es zum zeiten
vnd stunden ergehen sol.

Ich hab beschloffen/ mir sie zum gesellen zu
nemen / Denn ich weis/ das sie mir ein guter rat/
geber sein wird/ vnd ein tröster ym sorgen vnd
trawrigkeit/ Ein iüngling hat durch die selbigen
herrligkeit bey dem volck/ vnd ehre bey den alten.
Ich werde scharff erfunden werden ym gericht/
Vnd bey den gewaltigen wird man sich mein ver
wundern/ Wenn ich schweige/ werden sie auff
mich harren/ Wenn ich rede/ werden sie auffmer
cken/ Wenn ich aber weiter rede/ werden sie die
hende auff yhren mund legen/ Ich werde ein vn/
sterblichen namen durch sie bekommen/ vnd ein
ewiges gedechtnis bey meinen nachkomen las/
sen/ Ich werde leute regiren / vnd Deiden wer/
den mir vnterthan sein/ Grausame tyrannen wer/
den sich fürchten/ wenn sie mich hören/ vnd bey
dem volck werde ich gütig erfunden / vnd ym
krieg ein helt/ Bleib ich aber dabeym/ so hab ich
mein ruge an yhr/ Denn es ist kein verdrus/ mit
yhr umbzugehen / noch vnlust umb sie zu sein/
sondern lust vnd freude.

Solchs bedacht ich/ bey mir/ vñ nam es zu her
tzen/ Denn welche yhre verwandten sind/ haben
ewiges wesen/ vnd welche yhre freunde sind/ ha/
ben reine wollust / Vnd kompt vnendlicher reich/
thum

thum durch die erbeit yhrer hende/ vnd flugheit ^{(Arbeit) das}
durch yhr geselschafft vnd gesprech/ Vnd ein gu- ^{ist/durch yhre}
ter rhum durch yhr gemeinschafft vnd rede/ Ich ^{lere vnd rat.}
bin vmbher gangen zu suchen / das ich sie zu mir
brecht.

Denn ich war ein kind guter art/vnd habe
bekomen ein feine seele/ Da ich aber wol erzogen
war/ wuchs ich zu eyim vnbesleckten leibe / Da
ich aber erfur / das ich nicht anders kundte
keusch sein/ es gebe mir denn Gott/ Vnd dassel-
bige war auch flugheit/ erkennē/ wes solche gna-
de ist/ Trat ich zum **DLXXXI** vnd bat yhn vnd
sprach von gantzem meinem hertzen.

Das Neunde Capitel.

Got meiner veter/ Vñ **DLXXX** aller gü- ^{Sie redet der tichter}
te/der du alle ding durch dein wort ge- ^{vnd bittet ganz vñre}
macht/ vnd den menschen durch deine ^{Salomons person /}
weisheit bereitet hast/ das er hirrschen ^{zum exempele aller}
solt vber die Creatur/ so von dir gemacht ist/ das ^{fürsten auch also zu}
er die welt regieren solt mit heiligkeit vñ gerecht ^{thun/ Vñ ist aus der}
keit/ vnd mit rechtem hertzen richten. Gib mir die ^{massen ein schon ge-}
weisheit/ die stets vmb deinen thron ist/ vnd ver- ^{bet.}
wirff mich nicht aus deinen kindern / Denn ich
bin dein knecht vnd deiner magd son/ ein schwach-
cher mensch vnd kurtzes lebens/ vnd zu gering
ym verstand des rechtes vnd gesetzes/ Vnd wenn
gleich einer vnter menschenkindern volkomen we- ^{Siehe/die weisheit}
re/ so gillt er doch nichts/ wo er on die weisheit ^{kompt allein von Got}
ist/ so von dir kompt. ^{vnd on sie taltz nie-}
^{mand nichts.}

Du hast mich erwelet zum kōnige vber dein
D volck

volck / vnd zum richter vber deine sone vnd tochter / Vnd hiessst mich einen tempel bauen auff deinem heiligen berge / vnd einen altar ynn der stad deiner wohnung / der da gleich were der heiligen hütte / welche du vorzeiten bereitē ließst / vnd mit dir deine weisheit / welche deine werck weis / vnd da bey war / da du die welt machtest / vnd erkennet / was dir wolgefelt / vnd was richtig ist ynn deinen gepoten.

Sende sie erab von dem heiligen hymel vnd aus dem thron deiner herrligkeit / Sende sie / das sie bey mir sey / vnd mit mir erbeite / das ich erkenne / was dir wolgefalle / Denn sie weis alles vnd verstehets / Vnd las sie mich leyten ynn meinen wercken vernünfftiglich / vnd mich behüeten durch yhre herrligkeit / So werdē dir meine werck angenehme sein / vnd werde dein volck recht richten / vnd würdig sein des throns meines Vaters / Denn welcher mensch weis Gottes rat ? odder wer kan dencken was Gott wil ? Denn der sterblichen menschen gedancken sind mislich / vnd vnser anschlege sind vngewis / Denn der sterbliche leichnam beschweret die seele / vnd die yrdische hütte druckt den zerstreuten synn / Wir treffen das kaum / so auff erden ist / Vnd erfindē schwerlich / das vnter handē ist / Wer wil denn erforschen / das ym hymel ist ? Wer wil deinen rat erfahren ? Es sey denn das du weisheit gebest / vnd sendest deinen heiligen geist aus der höhe / vnd also richtig werde das thun auff erden / vnd die menschen lernen was dir gefelt / vnd durch die weisheit selig werden.

Das

On Gottes wort kan der mensch nicht wissen was Gott gefelt / sondern feret vñ thut alles ym zweifel vnd auffss vngewis.

(zerstreuten synn)
On Gottes wort / so tichtet vñ sucht die vernunfft viel weise vnd wege / zerstreuet sich also ynn viel mishe / trifft aber doch nicht.

Das Zehend Capitel.

Die selbige weisheit behütet den / so am
ersten gemacht vnd alleine geschaffen
ward / zum vater der welt / vnd bracht
yhn aus seiner funde / vnd gab yhm
krafft vber alles zu herrschen.

Adam.

(Sünde)

Durch das wort Ge-
nesis. iij. Der same
sol dir den kopff zu-
treten.

Cain.

Von welcher / da der vngerechte abfiel durch
seinen zorn / verdarb er von wegen des wutigen
bruder mords.

Vnd als die erden vmb desselbigen willen mit
der sindflut verterbet war / halff die weisheit wid-
derumb / vnd regierte den gerechten durch ein ge-
ringeholtz.

Noe.

(Weisheit)

Das war Gottes
wort vnd befelh die
archa zu bawen.

Die selbige / da die heiden verwirret wurden /
ynn gleicher bosheit / fand sie den gerechten / vnd
erhielt yhn vnstrefflich fur Gott / vnd lies yhn fe-
ste sein widder das veterliche hertz gegen den
son.

(Verwirret) Das

ist zu Babel Gen. xij.
Abraham.

Die selbige erlöset den gerechten / da die Got-
losen umbkamen / da er floch fur dem feuer / das
vber die funff stedte fiel / welcher verwüst land ste-
het noch ym dampff / zum zeugnis der bosheit /
samt den bewmen / so vnreiffe fruchte tragen /
vnd der saltz seulen / die da stehet zum gedechtnis
der vngleubigen seelen / Denn die / so die weis-
heit nicht achten / haben nicht allein den scha-
den / das sie das gute nicht kennen / sondern las-
sen auch ein gedechtnis hinder sich den lebendi-
gen / das sie nicht mügen verborgen bleiben / ynn
dem / darynn sie yrre gangen sind / Aber die weis-

Lot.

(Vnreiffe bewme)
Sollen sein die epffel
am todten meer / die
auswendig schon / vn-
ynnwendig asschen
sind / Sorba genant.

D ij heit

heit errettet die aus aller mühe/ so sich an sie hal-
ten.

Jacob. Die selbige leitet den gerechten/ so fur seines
bruders zorn flüchtig sein musste/ stracks weges/
vnd zeyget yhm das reich Gottes/ vnd gab yhm
zu erkennen was heilig ist/ vnd halff yhm ynn sei-
ner arbeit/ das er wol zunam/ vnd viel guts an
seiner arbeit gewan / Vnd war bey yhm/ da er
vberforteylet ward von den/ die yhm gewalt the-
ten/ Vnd machet yhn reich/ Sie bewaret yhn fur
den feinden/ vnd machet yhn sicher fur den/ so
nach yhm stelleten/ Vnd gab yhm sieg ynn star-
ckem kampf / das er erfure/ wie Gottseligkeit
mechtiger ist/ denn alle ding.

Gottseligkeit ist
glaube an das
wort Gottes
odder an die
weisheit.

Joseph. Die selbige verlies den verkaufften gerech-
ten nicht / Sondern behüetet yhn fur der sünde/
fur mit yhm hinab yn den kercker / vnd ynn den
banden verlies sie yhn nicht/ bis das sie yhm zu-
bracht das scepter des königreichs/ vnd oberkeit
vber die/ so yhm gewalt gethan hatten / Vnd
machte die zu lügener/ die yhn getaddelt hatten/
vnd gab yhm ein ewige herrlichkeit.

Israel. Die selbige erlösete das heilige volck / vnd vn-
strefflichen samen aus den heiden/ die sie plag-
tē/ Sie fur yn die seele des dieners des DEXXn/
Mose. Vnd widerstund den grausamen königen durch
wunder vnd zeichen/ Sie belohnet den heiligen
yhr arbeit/ vnd leitet sie durch wunderliche we-
ge/ vnd war yhn des tages ein schirm/ vnd des
nachts eine flamme/ wie das gestirn/ Sie furet sie
durchs

Durchs rote meer / vnd leytet sie durch grosse was-
ser / Aber yhr feinde ersenfft sie / vnd zoch sie aus
dem grunde der tieffen / Darumb namen die ge-
rechten raub von den Gottlosen / vnd preiseten dei-
nen heiligē namen **DLXX** / vnd lobeten einmü-
tiglich deine sieghafftige hand / Denn die weis-
heit öffenete der stummen mund / vnd machet der
vnmündigen zungen beredt.

Das Fiffte Capitel.

Sie furet der selbigen werck durch die
hand des heiligen Propheten / vnd ge-
leytet sie durch eine wilde wüstē / das sie
gezellt auff schlügen yn der einode / vnd
yhren feindē widderstunden / vnd sich recheten an
yhren widderwertigen / Da sie dürstet / rieffen sie
dich an / vnd yhn ward wasser gegeben aus dem
hohen fels / vnd lesscheten den durst aus hartem
stein / Vnd eben da durch yhre feinde geplagt
wurden / dadurch geschach yhn guts / da sie not
lidden / Denn wie yhene erschrackē fur dem blut /
so an stat des fliessenden wassers kam / zur straffe
des gebots / das man die kinder tödten muste / al-
so gabest du diesen wassers die fulle vnnersehens /
vnd zeygest damit an durch yhener durst / wie du
die widddertigen plagest.

Da das wasser zu blut
ward ynn Ex.
ppton Ex. vii

Denn da diese versucht vnd mit gnaden ge-
züchtiget worden / erkanten sie / wie die Gottlosen
mit zorn gericht vnd gequellert werden / Diese
zwar hastu als ein vater vermanet vnd geprüftet /

D iij **I**hene

Thene aber als ein harter König gefragt vnd ver-
dampt. Vnd es wurden beide die dabey waren vñ
die nicht dabey waren gleich geplagt / Denn es
kam zwifeltig leyd vber sie / dazu auch süffzen /
so sie des vorigen gedachten / Denn da sie höre-
ten / das diesen dadurch gutes geschach / durch
welchs sie gequellert wurden / fuletē sie den WEr-
ren / Denn den sie etwa verechtlich verstoßen vnd
verworffen hatten / vnd yhn verlachten / des mu-
sten sie sich zu letzt / da es so hinaus gieng / ver-
wundern / das yhr durst nicht so war / wie der ge-
rechten.

Also auch für die tollen gedanken yhres vn-
gerechten wandels / durch welche sie betrogen /
vnuernünfftige wurme vnd verechtliche thiere
an betten / sandtestu vnter sie die menge der
vnuernünfftigen thiere zur rache / auff das sie
erkennteten / das / Womit yemand sündiget / da-
mit wird er auch geplagt / Denn es mangelte dei-
ner almechtigen hand nicht (welche hat die welt
geschaffen aus vngestalteten wesen) vber sie zu
schicken menge der beeren / odder freydige lewen /
odder von new geschaffen / grymmige / vnbe-
kandte thier / odder die da fewr speyeten / odder
mit grymmigen rauch schnaubeten / odder grau-
same funcken aus den augen blicketen / Welche
nicht allein mit verserung sie möchten zu schmet-
tern / sondern auch wol mit yhrem schrecklichen
gesicht / erwürgen / Ja sie möchten wol on das /
durch einigen odem fallen / mit rache verfolget /
vnd durch den geist deiner krafft zurstrewet wer-
den.

Aber

Aber du hast alles geordenet mit mas/zal/
 vnd gewicht/ Denn gros vermügen ist allezeit
 bey dir/vnd wer kan der macht deines arms wid
 derstehen? Denn die welt ist fur dir/wie das züng
 lin an der wage / vndwie ein tropff des morgen/
 thawes/der auff die erden fellet/ Aber du erbar/
 mest dich vber alles/ den du hast gewalt vber al/
 les/ vnd versihest der mensche sünde/ das sie sich
 bessern sollen/ Denn du liebest alles das da ist/
 vnd hassdest nichts was du gemacht hast/ Denn
 du hast freylich nichts bereytet/ da du hafs zu
 hettest/ Wie kund etwas bleiben/wenn du nicht
 woltest? odder wie kundte erhalten werden/das
 du nicht geruffen hettest? Du schonest aber al/
 len/ Denn sie sind dein **DEUX** du liebhaber des
 lebens / vnd dein vnuerhenglicher geist ist ynn al/
 len.

(Zünglin)
 Gleich wie es sein
 mag/das das züng/
 lin ausschlegt/ also
 ein geringes ist die
 welt gegen Gott
 Isaie. xl.

Das Zwelffte Capitel.

Darumb straffestu balde die/ so da fal/
 len/vnd erymmerst sie mit zucht/ woran
 sie sundigen/ auff das sie von der bos/
 heit los werden/vnd an dich **DEUX**
 gleuben/ Denn da du feind warest den vorigen
 einwonern deines heiligen landes/ darumb das
 sie feindselige werck begiengen/mit zaubern/vnd
 woltest durch vnser Peter hende vertilgen die vn/
 göttlichen opfferer/vnd vnbarmhertzige morder
 yhrer sone/ die da menschen fleisch frassen vnd
 grewlich blut sofften/damit sie dir Gottes dienst
 erzeigen wolten/vñ die so elltern waren/erwürge/
 ten

Die Cananiter die
 yhre kinder opfferten
 Psalm. lxxvij.

ten die seelen / so keine hülffe hatten / auff das das
land / so fur dir vnter allen das edelste war / eine
würdige wonung würde der Kinder Gottes / den
noch verschonetest du der selbigen / als menschen /
vnd sandtest fur her deine furdraber / nemlich /
dein heer die hornissen / auff das sie die selbigen
mit der weile vmbbrechten.

Es war dir zwar nicht vnmüglich / die Got-
losen ym streit den gerechten zu vnterwerffen / od-
der durch grausame thier / odder soust etwa mit
ein harten wort / allzu gleich zuschmettern / Aber
du richtetest sie mit der weile / vnd liesest yhn
raum zur büsse / wie wol dir nicht vnberuost war /
das sie böser art waren / vnd yhr bösheit yhn an-
geboren / vnd das sie yhr gedanccken nymer mehr
endern würden / Denn sie waren ein verflucht sa-
men von anfang / So dürfftestu auch niemand
schewen / ob du yhn vergebest / woran sie gesun-
digt hatten / Denn wer wil zu dir sagen / Was
thustu ? Odder wer wil deinem gericht widderste-
hen ? Odder wer wil dich schuldigen vmb die ver-
tilgeten heiden / welche du geschaffen hast ? Od-
der wer wil sich zum rechter widder dich setzen /
vmb der vngerechten menschen willen ? Denn es
ist außser dir kein Gott / der du sorgest fur alle /
auff das du beweifest / wie du nicht vnrecht rich-
test / Denn es kan dir widder könig noch tyran-
nen vnter augen treten fur die / so du straffest.

Weil du denn gerecht bist / so regierestu alle
ding recht / Verdammest auch den / so der straffe
nicht schuldig ist / vnd achtest yhn frembde von
deiner

(Tyrannen) Siche/
wie er alle wort len-
cket vnd zeucht wid-
der die Tyrannen / sie
zu schrecken.

(Nicht schuldig ist)
s. Petri. v. Es ist zeit/
das am Gottes hau-
se das gericht anfas-
he / Gott strafft auch
vnd verdampt seine
heiligen hie zeitlich /
Deutero. xxxi. Ich
sire zur hellen / vnd
widder eraus.

deiner macht/ Denn deine stercke ist der gerechtigkeit anfang/ Vnd weil du vber alle herrschest/ so verschonestu auch aller / Denn du hast deine stercke beweiset/ an denen/ so nicht gleybten/ das du so gar mechtig werest/ vñ hast dich erzeiget an denen / die sich keck wusten/ Aber du gewaltiger herrscher/ richtest mit lindigkeit/ vnd regierest vns mit viel verschonen / Denn du vermagst alles was du wilt.

(Reck) Das ist/ an den Egyptern ym roten meer.

Dein volck aber lerestu durch solche werck/ das man frum vnd gutig sein sol/ vnd deinen kindern gibstu damit zuuerstehen / sie sollen guter hoffnung sein/ das du wollest busse fur die sünde annemen / Denn so du die feinde deiner kinder vnd die des todes schuldig waren / mit solchem verzug vnd schonen gestrafft hast/ vnd gabst yhn zeit vnd raum/ damit sie kundten von yhrer bosheit lassen/ Wie viel mit grosserm bedacht richtest du deine kinder/ mit welcher veter du hast eid vnd bund viel guter verheissungen auffgericht/ Darumb wie oft du vnser feinde plagest/ thustu solches vns zur zucht/ das wir deiner gute mit vleis warnemen / ob wir gerichtet worden/ das wir auff deine barmhertzigkeit trawen.

büße

Daher du auch die vngerechten/ so ein vnuerstendig leben fureten / mit yhren eigen grewlen quelletest / Denn sie waren so gar ferne ym den yrthum geraten/ das sie auch die thier/ so bey yhren feinden verachtet waren/ fur Götter hielten/ gleich wie die vnuerstendigen kinder/ betrogen/ Darumb hastu auch ein spöttliche straffe vnter sie/ als

(Vngerechten)
Die Egypter / so die thier anbetten/ welche die Jüden yhre feinde verachten.

spöttliche plage war
e/das sie durch die
ter geplagt wurde/
elche doch yhr Göt-
r waren / vnd yhn
elffen solten.

sie/als vnter vnuerstendige kinder/geschickt/Da
sie aber solche spöttliche vermanung nicht be-
wegt / empfunden sie die ernste Gottes straffe/
Denn sie wurden eben dadurch gequelllet/ das sie
für Götter hielten/ welchs sie gar vbel verdros/
da sie den sahen/den sie vorhin nicht wolten ken-
nen / Vnd mussten yhn für einen Gott bekennen/
darumb zu letzt die verdammnis auch vber sie
kam.

Das dreyzehend Capitel.

AS sind zwar alle menschen natürlich
eitel/so von Gott nichts wissen/vnd an
den sichtbarlichen gütern/den der es ist/
nicht kennen/vnd sehen an den wercken
nicht/wer der meister ist/Sondern halten entwe-
der/das ferner/odder wind/odder schnelle lufft/
odder die sterne am hymel/odder mechtigs was-
ser/odder die liechtstar/die die welt regieren/ für
Götter/ So sie aber an der selbigen schonen ge-
stalt gefallen hatten/vnd also für Götter hielten/
solten sie billich gewust haben/wie gar viel besser
der sey/der vber solche der herr ist/Denn der al-
ler schöne meister ist/hat solchs alles geschaffen.
Vnd so sie sich der macht vnd krafft verwunder-
ten/solten sie billich an den selbigen gemerckt ha-
ben/wie viel mechtiger der sey/der solch alles zu-
bereithat/ Denn es kan ia an der grossen schonen
vnd gescheffte/der selbigen meister/ehnlich erse-
hen werden.

Liechtstar
sind Sonn vñ
Mon.

(krafft) Das
ist/ mangelley
werck vnd tu-
gent der crea-
tur.

Wie wol vber diese nicht so gar hoch zu klas-
gen

gen ist / Denn auch sie wol yrren künden wenn sie
Gott suchen vnd gerne funden / Denn so sie mit
seinem geschepff vmbgehen vnd nach denccken /
werden sie gefangen ym ansehen / weil die creatur
so schone sind / die man sibet / Doch sind sie da
mit nicht entschuldiget / Denn haben sie so viel
mügen erkennen / das sie künden die welt ermes
sen / Warumb haben sie nicht viel ehe den herrn
der selbigen funden?

(Ermeffen)
Das ist / mercken wt
schön vnd mancher
ley krafft vnd werck
die Creatur haben vi
ehen.

Aber das sind die vnseligen / vnd der hoff
nung billich vnter die todten zu rechnen ist / die da
menschen gemecht / Gott heissen / als Gold vnd
sylber / das künstlich zu gericht ist / Vnd die bilder
der thiere / odder vnnütze steine / so vor alten iaren
gemacht sind / Als wenn ein zymmerman / der zu
erbeitē sucht / etwa einen bawm abherwet vnd be
schlehet / vnd schlichtet den selbigen wol / vnd
macht etwas künstlichs vnd feins daraus / des
man brauchet zur notturfft ym leben / die spehri
aber von solcher arbeit brauchet er speise zu Kochē /
das er sat werde / Was aber dauon vberbleibet /
das sonst nichts nütze ist / als das krum vnd estig
holtz ist / nimpt vnd schnitzet / wenn er müffig
ist / mit vleis / vñ bildets nach seiner kunst meister
lich / vnd machts eines menschen oder verachten
thiers bilde gleich / vnd ferbets mit roter vnd wei
sser farbe rot vnd schön / vnd wo ein fleckē daran
ist / streicht ers zu / vñ macht yhm ein feines heng
lin / vnd setzs an die wand / vnd hefftets fest mit
eisen / das nicht falle / so wol versorget ers / Denn
er weis / das yhm selber nicht helffen kan / Denn
es ist ein bilde / vnd darff wol hülffe.

¶ ij Vnd

Vnd so er bettet fur seine güter / fur sein weib /
fur seine kinder / schemet er sich nicht / mit ei-
nem leblosen zu reden / Vnd ruffet den schwach-
chen vmb gesundheit an / bittet den todten vmb
leben / flehet dem vntüchtigen vmb hülffe / vnd
dem / so nicht gehen kan / vmb selige reise / Vnd
vmb seinen gewin / gewerbe vnd hanthierunge /
das wol gelinge / bittet er den / so gar nichts ver-
mag.

Das Vierzehend Capitel.

DEs gleichen thut / der da schiffen wil
vnd durch wilde fluten zu faren geden-
cket / vnd ruffet an viel ein feuler holtz /
denn das schiff ist / darauff er feret /
Denn dasselbige hat der geitz erfunden / vnd der
meister hats mit kunst zubereit / Aber deine fur-
sichtigkeit / O Vater / regiert es / Denn du auch
ym meer wege gibst / vnd mitten vnter den wellen
sichern laufft / Damit du beweifest / wie du an al-
len enden helffen kanst / ob auch gleich yemand
on schiff yms meer sich gebe / Doch weil du
nicht wilt / das ledig ligge / was du durch deine
weisheit geschaffen hast / geschichts / das die
menschen yhr leben auch so geringem holtz ver-
trawen / vnd behalten werden ym schiff / damit
sie durch die meer wellen faren.

Denn auch vor alters / da die hohmütigen
riesen vmbbracht wurden / flohen die / an wel-
chen hoffnung bleib die welt zu mehren / ynn ein
schiff /

schiff/welchs deine hand regierte/ vnd liessen als
so der welt samen hinder sich/ Denn solch holtz
ist segens wol werd / damit man recht handelt/
Aber des fluchs werd ist/das/so mit henden ge-
schnitzt wird/ so wol als der / der es schnitzet/
Dieser darumb / das ers machet / yhenes dar-
umb / das es Gott genennet wird/so es doch ein
vergenglich ding ist/Denn Got ist beyden gleich
feind/ dem Gottlosen vnd seinem Gottlosen ge-
scheffte/ Vnd wird das werck sampt dem meister
gequellert werden.

Darumb werden auch die götzen der heiden
heimgesucht/Denn sie sind aus der creatur Got-
tes/ zum grewel vnd zum ergernis der menschen
seelen / vnd zum strick den vnuerstendigen / wor-
den/Denn Götzen auffrichten ist die höchste hu-
rerey / Vnd die selbigen erdencken ist ein sched-
lich exempel ym leben/ Von anfang sind sie
nicht gewesen/werden auch nicht ewig bleiben/
Sondern durch eitel ehre der menschen sind sie
ynn die welt komen/ vnd darumb erdacht/das
die menschen eins kurtzen lebens sind/ Denn ein
vater/so er vber seinen son/der yhm allzu frue da-
hin genomen ward / leid vnd schmertzen trug/
lies er ein bilde machen/Vnd fieng an/den/so ein
tod mensch war/nu fur Gott zu halten/ vnd stiff-
tet fur die seinen ein Gotsdienst vnd opffer/Dar-
nach mit der zeit/ward solche Gottlose weise fur
ein recht gehalten/das man auch musste bilder
ehren aus der tyrannen gebot.

Desselbigen gleichen/welchen die lente nicht
E iij Kundten

von götzen

Kundten vnter augen ehren/ darumb das sie zu
ferne woneten / liessen sie aus fernen landen das
angefichte abmalen / vnd machten ein löblich bil
de des herrlichen Königes / auff das sie mit vleis
heuchlen möchten dem abwesenden / als dem ge
genwertigen / So treib auch der Künstler ehrgei
tigkeit die vnuerstendigen zu stercken solchen Got
tes dienst / Denn welcher dem fürsten wolt wol
dienen / der machte das bild mit aller kunst auff
s feinst / Der hauffe aber / so durch solch fein ge
mechte gereitzt ward / fieng an / den für einen Got
zu halten / welcher Kurtz zuuor für ein mensch ge
ehret war / Aus solchen kam der betrug ynn die
welt / wenn den leuten etwas angelegen war / od
der wolten den Königen hofieren / gaben sie den
steinen vnd holtz solchen namen / der doch den sel
bigen nicht gebürt.

Darnach liessen sie sich nicht daran benü
gen / das sie ynn Gottes erkentnis yrreten / son
dern ob sie gleich ynn eym wüsten wilden wesen
der vnweisheit lebeten / nenneten sie doch solchen
Krieg vnd vbel / friede / Denn entwedder sie wür
gen yhre Kinder zum opffer / odder pflegen Got
tes dienst / der nicht zu sagen ist / odder halten wü
tige fresserey / nach vngewonlicher weise / vnd ha
ben forder widder reinen wandel noch ehe / Son
dern einer erwürget den andern mit list / odder be
leydiget yhn mit ehebruch / Vnd gehet bey yhn
vnternander her / blut / mord / diebstal / falsch / be
trug / vntrew / pochen / meyneid / vnruhe der fru
men / vndanck / der iungen hertzen ergernis / stum
men sünden / blutschanden / ehebruch / vnzucht /
Denn

(Vnruhe)
Das sie den
frumen all vn
ruhe vnd pla
ge anlegen.

Denn den schendlichen Götzen dienen/ist alles bösen anfang/vrsach vñ ende/Halten sie feyrtagge / so thun sie/ als weren sie wüetend / Weissagen sie / so ist eitel lügen/ sie leben nicht recht/ schweren leichtfertig falschen eid / Denn weil sie glenben an die leblosen Götzen/ besorgen sie sich keines schadens/ wenn sie felschlich schweren / Doch wird aller beyde recht vber sie komen/ beyde des/ das sie nicht recht von Gott halten/weil sie auff die Götzen achten/ vnd des/ das sie vnrecht vnd felschlich schweren/ vnd achten kein heiliges/ Denn der vngerechten bösheit nympt ein ende / nicht nach der gewalt/ die sie haben/ wenn sie schweren/sondern/nach der straffe/die sie verdienen mit yhrem sundigen.

Das Funffzehend Capitel.

Aber du vnser Gott bist freundlich / vnd trew / vnd langmütig / vnd regierst alles mit barmhertzigkeit / Vnd wenn wir gleich sundigen / sind wir doch dein / vnd kennen deine macht / Weil wir denn solchs wissen / sundigen wir nicht / Denn wir sind fur die deinen gerechnet / Dich aber kennen / ist eine volkomen gerechtigkeit / vnd deine macht wissen / ist eine würtzel des ewigen lebens / Denn vns verführen nicht so der menschen böse fundle / noch der maler vnnütze erbeit / nemlich ein bund bilde mit mancherley farbe / welchs gestalt die vnerstendigen ergert / Vnd die gerne böses thun / haben auch yhre lust an dem leblosen vnd toden bilde /
Sie sind

Sie sind auch solcher frucht werd / beyde / die sie
machen / begeren vnd ehren.

Vnd ein töpffer / der den weichen thon mit
mühe erbeitet / macht allerley gefess / zu vnserm
brauch / Er macht aber aus einerley thon beide
gefesse / die zu reinen / vnd zu gleich auch die zu vn
reinen wercken dienen / Aber wo zu ein iglichs der
selbigen sol gebraucht werden / das stehet bey
dem töpffer / Aber das ist ein elende arbeit / wenn
er aus dem selbigen thon einen nichtigen Gott
macht / so er selbs doch nicht lange zuuor von er
den gemacht ist / vnd vber ein Kleines widder da
hin feret / dauon er genomen ist / wenn die seele / so
er gebraucht hat / von yhm genomen wird / Aber
seine sorge stehet darauff / nicht das er erbeite /
noch das er so ein kurtz leben hat / Sondern das
er vmb die wette erbeite mit den goldschmiden
vnd silberschmiden / vnd das ers den rotgiessern
nach thun müge / Vnd er hellts fur einen rhum /
das er falsche arbeit macht / Denn seines hertzen
gedancken sind wie asschen / vnd sein hoffnung
geringer denn erden / vnd sein leben verechtlicher
denn thon / weil er den nicht kennet / der yhn ge
macht / vnd yhm die seele / so ym yhm wirckt /
eingegossen / vnd den lebendigen oddem eingebra
sen hat.

Sie halten auch das menschlich leben fur ei
nen schertz / vnd menschlichen wandel fur einen
iarmarekt / geben fur / man müsse allenthalben ge
winst suchen / auch durch böse stück / Diese wis
sen fur allen / das sie sundigen / wenn sie solche
lose ding

lose ding vnd bilder aus irdischem ihon mache/
Sie sind aber törichter vnd elender denn ein kind
(nemlich die feinde deines volcks/ welchs sie vns
terdrucken) das sie allerley götzen der heiden für
Götter halten/welcher augen nicht sehen/noch
yhre nasen lufft holen/ noch die ohren hören/
noch die finger an yhren henden fulen können/
vnd ihre fusse gar faul zu wandern/ Denn ein
mensch hat sie gemacht/ vnd der den odem von
ein andern hat/hat sie gebildet/ Ein mensch aber
kan ia nicht machen / das yhm gleich sey / vnd
dennoch ein Gott sey/ Denn weil er sterblich ist/
so macht er freylich einen todten mit seinen Gott-
losen henden/ Er ist ia besser/ denn das/dem er
Gottes dienst thut / Denn er lebet doch/yhene
aber nymermehr.

Dazu ehren sie auch die aller feindseligsten
thier/welche/so man sie gegen ander vnuernünfftigen
thier helt/ sind sie viel erger / Denn sie sind
nicht lieblich/wie ander thier/die fein anzusehen
sind/Vnd sind von Gott widder gelobt noch ge-
segenet.

(gesegnet)
Das sind die
schlangen/wel-
che Ene. 11f.
auch verflucht
sind.

Das Sechzehend Capit.

Darumb wurden sie mit der selbigen glei-
chen billich geplagt/vnd würdē durch
die menge der bösen wurm gemartert/
Gegen welche plage thetestu deinem
volck guts/ vnd bereitest yhm ein seltzam essen/
nemlich/

nemlich / wachtern zur narung / nach welcher sie
lustern warē / Auff das die / so nach solcher speise
lustern waren / durch solche dargegeben vñ zuge-
schickte wachtern / lerneten auch der natürlichen
notturfft abbrechen / Die andern aber / so ein klei-
ne zeit mangel lidden / einer newen speise mitge-
nossen / Denn es solte also gehen / das ihenen /
so tyrannisch handeleten / solcher mangel widder
fure / der nicht auff zuhalten were / Diesen aber al-
lein ein anzeigen geschehe / wie yhre feinde gepla-
get würden.

(Nume. xvi)
Die eherne
schlange war
das zeichē wid-
der die feuri-
ge schlangen.

Zwar es kamen vber diese auch böse zornige
thiere / vnd wurden gebissen vnd verderbet durch
die krummen schlangen / doch bleib der zorn end-
lich nicht / Sondern würdē ein kleine zeit erschre-
cket zur warnung / Denn sie hatten ein heilsam
zeichen / auff das sie gedechten an das gebot vnn
deinem gesetzte / Denn welche sich zu dem selbi-
gen zeichen kereten / die wurden gesund / nicht
durch das / so sie anschaweten / sondern durch
dich / aller Weiland / Vnd daselbst mit beweise-
stu vnsern feinden / das du bist der helffer aus al-
lem vbel.

Aber ihene wurden durch hewschrecken vnd
fliegen zu tod gebissen / vnd kundten kein hülffe
yhres leben finden / Denn sie warens werd / das
sie damit geplagt würden. Aber deinen kindern
kundten auch der gifftigen drachen zene nicht
schaden / Denn deine barmhertzigkeit war da-
fur / vnd machte sie gesund / Denn sie ~~wurden~~
darumb

darumb also gestrafft vnd flugs widder geheilet/
auff das sie lerneten an deine wort gedenccken/
vnd nicht zu tieff yns vergessen fielen / sondern
blieben vnabgewendet von deinen wolthaten/
Denn es heilete sie widder kraut noch pflaster/
sondern dein **W D X T D L X X** / welchs alles
heilet / Denn du hast gewalt / beide vber lebē vnd
vber tod / Vnd du furest hinuntern zur hellen pfor-
ten / vnd furest widder heraus. Ein mensch / so
er yemand tödtet durch seine bösheit / so kan er
den ausgefahren geist nicht widder bringen / noch
die verschiedene seele widder holen.

(Wolthaten)
Das sie nicht
vergessen der
wunderzeichē/
so yhn geschē-
ken war.

Aber vnmüglich ists deiner hand zu entflie-
hen / Denn die Gottlosen / so dich nicht kennen
wolten / sind durch deinen mechtigen arm ge-
steupt / da sie durch vngewonliche regen / hagel /
gewesser / den sie nicht entgehen kundten / verfol-
get / vnd durchs feuer auffgefressen worden /
Vnd das war das aller wunderlichst / das feuer
am meisten ym wasser brand / welchs doch alles
auslesschet / Denn die welt streit fur die gerech-
ten / Zu weilen thet die flamme gemach / das sie
ia nicht verbrennete die thier / so vnter die Gottlo-
sen geschickt waren / Sondern das sie selbst sehen
musten / wie sie durch Gottes gerichte also zutrie-
ben worden. Zu weilen aber brennete die flammē
ym wasser / vber die macht des feuers / auff das
es die vngerechten vmbbrechte.

Da gegen neretestu dein volck mit Engel
speise / v. id sandtest yhn brod bereit vom hymel /
S ij on erbeit /

(Allerley lust)
Das ist/ Er
kunds mache
wo zu er wolt/
backen/ brate/
sieden/ kochen/
durren. etc.

Matth. iii.
Der mensche
lebt nicht al-
lein vom brod
etc.

Exod. xvij. da
das hymel
brod von der
Sonnen zu-
schmaltz.

on erbeit/welchs vermocht allerley lust zu geben/
vnd war einem iglichē nach seinem schmack eben
(Denn so man auff dich harret/das macht deis-
nen Kindern offenbar/wie süsse du seiest) Denn
ein iglicher machte daraus/was er wolt/nach
dem yhn lust an kam/so odder so zu schmecken/
Dort aber bleib auch der schnee vnd schlossen
ym feuer/vnd verschmoltzen nicht/Auff das sie
ynne würden/wie das feuer/so auch ym hagel
brennete vnd ym regen blitzete/der feinde fruchte
verderbet / Das selbige feuer/auff das sich die
gerechten bekereten / must es seiner eignen krafft
vergessen / Denn die Creatur/so dir / als dem
schepffer/ dienet/ist hefftig zur plage vber die vn-
gerechten/vñ thut gemach zur wolthat vber die/
so dir trawē/Darumb lies sie sich auch dazumal
ymn allerley wandeln/vnd dienete ym der gabe/
welche alle neeretet nach eines iglichen willen/
wie ers bedurfft/Auff das deine Kinder lerneten/
die du **NEX** liebhaft/das nicht die gewach-
sen fruchte den menschen erneren/ Sondern dein
wort erhellt die/so an dich glewben/Denn das/
so vom feuer nicht verzeret ward / das ward
schlecht von ein geringen glantz der Sonnen
warm vnd verschmeltzt/Auff das kund würde/
das man / ehe die Sonne auffgehet/dir dancken
solle/Vnd fur dich treten/wenn das liecht auff-
gehet/Denn eines vndanckbarn hoffnung wird
wie ein reiffe ym winter zurgehen / vnd wie ein
vnnütz wasser verfließen.

Das Siebenzehend Capit.

Gros

Gnos vnd vnsagelich sind deine gerichte
DXXX/ Darumb feylen auch die tö-
richten leute/ Denn da sie meyneten das
heilige volck zu vnterdrücken/ wurden
sie/ als die vngerechten/ der finsternis gebundene
vnd der langē nacht gefangene/ vnd als die fluch-
tigen/ lagen sie vnter den dechern verschlossen für
der ewigen weisheit/ Vnd da sie meyneten/ yhre
sunde solten verborgen vnd vnter einem blinden
deckel vergessen sein/ wurden sie grausamlich zur
strewet/ vnd durch gespenste erschreckt/ Denn
auch der winckel/ darynn sie waren/ kundte sie
nicht on!furcht bewaren/ Da war gedōne
vmb sie her/ das sie erschreckt/ vnd scheusliche
laruen erschienen/ dauon sie sich entsatzten/ Vnd
das feur vermocht mit keiner macht yhn zu leuch-
ten/ noch die hellen flammen der sterne/ kundten
die elende nacht liecht machen/ Es erschein yhn
aber wol ein selbbrennend feur/ voller erschreck-
nis/ Da erschracken sie für solchem gespenst/
das doch nichts war/ vnd dachten/ es were noch
ein ergers dahinden/ denn das sie sahen.

(Feyler)
das ist yhr an
schlege widder
die gerechte ge-
hen zu rucke/
psalm. lxxxv.
Deine feinde
seylen etc.

Das gauckelwerk der schwartzen kunst lag
auch darnidder/ vnd die stoltze kunst ward zu
schanden/ Denn die sich vnterwunden die furcht
vnd schrecknis von den krankten seelen zu treibē/
wurden selbs krank/ das man auch yhrer furcht
spottet/ Vnd wenn sie schon keins solcher schreck-
nis hette erschreckt/ so hetten sie doch mocht für
furcht vergehen/ da die thier vnter sie furen/ vnd
die schlangen mit hauffen so zisscheten/ das sie
auch ynn die lufft/ welcher sie doch nicht entpes-

Exod ix. hatte
die zeuberer
auch die bräse
wie ander leu-
te.

G ren

Conscientia
vultu testis.

ren kundten/ nicht gerne sahen/ Denn das einer
so verzagt ist/ das macht seine eigen bosheit/ die
yhn vberzeuget vnd verdammet / Vnd ein er-
schrocken gewissen versihet sich ymerdar des er-
gesten/ Denn furcht kompt daher/ das einer sich
nicht trawet zumerantworten/ noch kein hülffe
weis/ Wo man aber ym hertzen des weniger ge-
warten darff/ da trawet einer deste ehe/ das die
straffwürdige schuld / verborgen bleibe.

Die aber/ so zu gleich die selbigen nacht schlie-
ffen (welche ein grewliche vnd ein rechte nacht/
vnd aus der grewlichen hellen winckel komen
war) wurden etliche durch grausame gespenst
vmbgetrieben / etliche aber fielen dahin/ das sie
sich des lebens erwegeten/ Denn es kam vber sie
ein plötzliche vñ vnuersehene furcht/ das gleich/
wo einer war / der drinn ergriffen ward / den
dürffte man ynn kein fessel verschliessen noch ver-
waren / er were ein ackerman/ odder hirte/ odder
ein erbeiter ynn der wüsten/ sondern er müste/ als
vbereilet/ solche vnmeidliche not tragen / Denn
sie waren alle zu gleich mit einerley keten der fin-
sternis gefangen. Wo etwa ein wind hauchet/
odder die vögel süsse sungen vnter den dicken zwei-
gen/ oder das wasser mit vollem lauff rausschet/
odder die steine mit starckem poltern fielen/ odder
die springenden thier/ die sie nicht sehen kundten/
lieffen/ oder die grausamen wilde thier heuleten/
odder der widerhall aus den hohlen bergen schal-
let/ so erschreckt es sie / vnd machte sie verzagt.
Die gantze welt hatte ein helles liecht/ vnd gieng
ynn vnuerhinderten geschefften/ Allein vber dies-
sen stund ein tieffe nacht/ welche war ein bilde
des

des finsternis / das vber sie komen solte / Aber sie
waren yhn selbs schwerer / denn die finsternis.

Das Achtzehend Capitel.

Aber deine heiligē hattē ein gros liecht /
vnd die feinde hōreten yhre stym wol /
aber sahen yhre gestalt nicht / vnd lobetē
ten es / das sie nicht der gleichen lid den /
vnd danckten / das die / so von yhn zuuor belei-
digt waren / sich nicht an yhn rechetē / vnd wūn-
scheten / das sie ia ferne von yhn blieben . Dage-
gen gabestū diesen eine fewrige seule / die yhn den
vnbekandten weg weiset / vnd liessst sie die sonne
nicht verseeren auff der herrlichen reise.

Denn ihene warens auch werd / das sie des
liechts beraubt / vnd ym finsternis / als ym Kerker /
gefangen legen / so deine kinder gefangen hielten /
durch welche das vnuerhenglich liecht des ge-
setzs der welt gegeben solt werden / Vnd als sie
gedachten der heiligen kinder zu tödten (Eines
aber der selbigen / so weg geworffen / vnd yhn zur
straffe erhalten ward) namerstu yhn kinder mit
hauffen weg / vnd verderbetest sie auff ein mal yn
mechtigem wasser.

(Eines) das
ist / Moses
Exod. ii.

Zwar die selbige macht war vnsern Vetern
zuuor kund worden / auff das sie gewis weren /
vnd sich freweten der verheissung / dran sie gleub-
ben / Vnd dein volck wartet also auff das heil der
gerechten / vnd auff das verderben der feinde /
Denn eben da du die widderwertigen plagtest /
machtestū vns / so du zu dir foddertest / herrlich /
Vnd als die heiligen kinder der frumen dir op-

G ij fferten yn

Erod. xii. Das
osterlamb op-
fferten sie vn-
ter sich allein/
on die Egypter

fferten ym verborgen / vnd handelten das Götts-
lich gesetz eintrechtig / namen sie es an / als die
heiligen / beide guts vnd böses miteinander zu lei-
den / Vnd die Veter sungen vor her den lobes-
sang.

Da gegen aber erschallet der feinde gar vn-
gleich geschrey / vnd kleglich weinen höret man
hin vnd widder vber kinder / Denn es gieng glei-
che rache / beide vber herr vnd knecht / Vnd der
könig musste eben / das der gemein man / leiden /
Vnd sie hatten alle auff ein hauffen vnzeliche
todten einerley todes gestorben / das der lebendi-
gen nicht gnug waren sie zubegraben / Denn ynn
einer stunde war dahin / was yhr edelste geburt
war / Vnd da sie zuuor nichts glauben wolten /
durch die zuberer verhindert / mussten sie / da die
ersten geburt alle erwürget wurden / bekennen /
das dis volck Gottes kinder weren.

Denn da alles still war vnd ruget / vnd eben
recht mitten nacht war / fur dein almechtiges wort
herab vom himel aus königlichem thron / als ein
hefftiger kriegs man / mitten yn das land / so ver-
terbet werdē solt / nemlich / das scherffe schwerd /
das ein ernstlich gebot bracht / stund vnd machts
allenthalben voller todten / vnd wie wol es auff
erden stund / rüret es doch bis ynn himel / Da er-
schrecktet sie plötzliche das gesicht grewlicher
trewme / vnd vnuersehens kamen fürcht vber sie /
Vnd lag einer hie / der ander da / halbtod / das
man wol an yhn sehen kund / aus was vrsachen
er so stürbe / Denn die trewme / so sie erschrecktet
hatten / zeigtens an / auff das sie nicht ver-
dorben

borben vnwissend / warumb sie so vbel geplagt
weren.

Es traff aber dazumal auch die gerechten
des todes anfechtung / vnd geschach ynn der wü-
sten ein riss vnter der menge / Aber der zorn weret
nicht lange / Denn eilend kam der vnschuldige
man / der fur sie streit / vnd furet die waffen seines
ampts / nemlich / das gebet / vnd versünung mit
dem reuchwerck / vnd widderstund dem zorn /
vñ schafft dem iamer ein ende / Damit beweiset
er / das er dein diener were / Er vberwand aber
das getümmel / nicht mit leiblicher macht / noch
mit waffe krafft / sondern mit dē W D X T warff
er vnter sich den plager / da er erzelet den eid vnd
testament den veteren verheissen / Denn da itzt die
todten mit hauffen vberinander fielen / stund er
ym mittel / vnd steuret dem zorn / vnd legt yhm
den weg zu den lebendigen / Denn ynn seinem lan-
gen rock war der gantze schmuck / vnd der veter
ehre yn die vier riege der steine gegraben / vnd dei-
ne herrligkeit an dem huet seines hewbts / Sol-
chen stücken muste der verderber weichen / vnd
solche muste er furchten / Denn es war daran ge-
nug / das allein ein versuchung des zorns were.

Num. xxi. die
feurige schlan-
ge.

(Schmuck)
die priesterliche
schöne kleider.
(Ehre)
die zwelff nas-
me der zwelff
steme Israel.

Das Neunzehend Capitel.

Aber die Gottlosen vberfiel der zorn on
barmhertzigkeit bis zum ende / Denn er
wuste zuuor wol / was sie künfftig thun
würden / nemlich / da sie yhn geboten
hatten weg zu ziehen / vnd dazu sie mit vleis las-
sen geleiten / das sie es gerewen würde / vnd yhn
nach

nach iagen / Denn da sie noch leide trugen / vnd bey den todten grebern klagten / fielen sie auff ein anders thörllich furnemen / das sie verfolgen wolten / als die flüchtigen / welche sie doch mit flehen hatten ausgestossen / Aber es musste also gehen / das sie zu solchem ende kemen / wie sie verdienet hatten / vnd mussten vergessen / was yhn widderfahren war / auff das sie vollend die straffe vberkemen / die noch dahinden war / Vnd dein volck ein wunderliche reise erfüre / ihene aber ein newe weise des todes fünden.

Denn die gantze creatur / so yhr eigen art hatte / verenderte sich widderumb / nach deinem gebot / dem sie dienet / auff das deine kinder vnuerseert bewaret würden. Da war die wolcke vnd beschattet das lager / Da zuvor wasser stund / sahe man trocken land erfür komen / Da ward aus dem roten meer ein weg on hindernis / vnd aus den mechtigen fluten ein grünes feld / durch welches gieng alles volck / so vnter deiner hand beschirmet ward / die solche wunderliche wunder sahen / vñ giengen wie die rosse an der weide / vnd lecketen wie die lemmer / vnd lobeten dich **DLXX** / der sie erlöset hatte. Denn sie gedachten noch daran / wie es ergangen war ym elende / Wie die erde an stat der geborne thier / fliegen bracht / vnd das wasser an stat der fische / frosche die menge gab. Demnach aber sahen sie auch ein newe art der vogel / da sie lustern wurden / vnd vmb niedliche speise baten / Denn es kamen yhn wachteln vom meer / yhr lust zu büßen.

Auch kam die straffe vber die sunder / durch zeichen / so mit mechtigem blitzen geschahen /
Denn

Denn es war recht / das sie solchs lidben vmb
yhrer bösheit willen / weil sie hatten die geste
vbel gehalten. Etliche / wenn die kamē / so nirgent
hin wustē / namen sie die selbigen nicht auff / Etli
che aber / zwungen die fromen geste gleich zum
dienst (Vnd das nicht allein / sondern es wird
auch noch ein anders einsehen vber sie kōmen /
das sie die frembden so vnfremdlich hielten) Et
liche aber / die / so sie mit freuden hatten angeno
men / vnd stadrecht mit geniessen lassen / plagten
sie mit grossen schmerzen. Sie würdē aber auch
mit blindheit geschlagen / gleich wie ihene fur der
thür des gerechten mit so dicker finsternis vberfal
len / das ein iglicher suchte den gang zu seiner
thür.

Gene. xix.

Die element giengen durch einander / wie die
seiten auff dem Psalter durch einander klingen /
vnd doch zusamen lauten / wie man solchs an der
that wol sibet / Denn was auff dem lande zu sein
pfllegt / das war ym wasser / Vnd was ym wasser
zu sein pfllegt / gieng auffm lande. Das feur war
mechtig ym wasser / vber seine krafft / vnd das
wasser vergas seine krafft zu lesschen. Widerumb
die flammen verzereten nicht das fleisch der sterb
lichen thier / so drunter giengen / Vnd zurschmeltz
ten nicht die vnsterbliche speise / die doch / wie ein
eiss / leichtlich zurschmaltz.

(Speise) das
hymelbrod /
welchs von
der sonnen zu
schmeltzt etc.

WER du hast dein volck allenthalben her
lich gemacht vnd geehret / Vnd hast sie nicht ver
acht / sondern alle zeit vnd an allen orten yhn bey
gestanden.

Bedrückt zu Wittenberg / durch
Dans Lufft. 1. 5. 2. 9.

Faint, illegible text in a medieval script, likely Gothic or similar, covering the upper portion of the page. The text is mirrored across the page, suggesting bleed-through from the reverse side.

Second block of faint, illegible text in a medieval script, continuing the mirrored bleed-through from the reverse side of the page.

Handwritten text at the bottom of the page, possibly a signature or a date, appearing as a mirrored bleed-through from the reverse side.



6.

7.7 L 1025

X 2447974

346.



Inches 1 2 3 4 5 6 7 8
Centimetres 1 2 3 4 5 6 7 8 9 10 11 12 13 14 15 16 17 18 19

Farbkarte #13

B.I.G.

Blue

Cyan

Green

Yellow

Red

Magenta

White

3/Color

Black

